

Maktabgacha va maktab ta'limi vaziri jamg'armasi hisobidan har oylik ustama olish uchun nomzodlarni 1-bosqich test sinovlari orqali saralash bo'yicha REGLAMENT

1-bob. Umumiy qoidalar

1. Mazkur Reglament Maktabgacha va maktab ta'limi vaziri jamg'armasi hisobidan har oylik ustama oladigan malakali pedagog kadrlarni 1-bosqich test sinovlari orqali saralash tartibini belgilaydi.

2. Ushbu Reglamentda quyidagi asosiy tushunchalardan foydalaniladi:

malakali pedagog kadrlar — vazirlik tizimidagi umumiy o'rta ta'lim muassasalarida faoliyat yuritayotgan:

o'quvchilari oliy ta'lim muassasalariga yoki Ixtisoslashtirilgan ta'lim muassasalari agentligi tizimidagi maktablarga kirish imtihonlarida eng yuqori natija ko'rsatgan pedagog kadrlar;

o'quvchilari xalqaro yoki respublika miqyosidagi musobaqa va tanlovlarda sovrinli o'rinlarni qo'lga kiritgan pedagog kadrlar;

Ishchi guruh – Maktabgacha va maktab ta'limi vazirining 2023-yil 27-dekabrda 576-son buyrug'i bilan tashkil etilgan Maktabgacha va maktab ta'limi tizimida faoliyat yuritayotgan malakali pedagog kadrlarga va ilg'or xodimlarga bir martalik pul mukofotlarini to'lash ishlarini muvofiqlashtiruvchi ishchi guruh;

yillik kvota – vazir jamg'armasi hisobidagi mablag'lardan kelib chiqib vazirlik tomonidan tasdiqlanadigan har oylik ustama oladigan pedagoglarga ajratiladigan ustamalarning jami miqdori;

hududiy kengashlar – O'zbekiston Respublikasi Prezidentining “Xalq ta'limi tizimini isloh qilish bo'yicha qo'shimcha chora-tadbirlar to'g'risida” 2022-yil 3-fevraldagi F-22-son [farmoyishiga](#) muvofiq tashkil etilgan xalq ta'limi tizimini isloh qilish bo'yicha Qoraqalpog'iston Respublikasi, viloyatlar va Toshkent shahar kengashlari;

hudud va tuman (shahar)lar kvotasi – vazirlik tomonidan tasdiqlangan yillik kvotalarni “Boshlang'ich ta'lim”, “Aniq va tabiiy fanlar”, “Xorijiy tillar”, “Ijtimoiy va filologiya fanlari” va “Amaliy fanlar” yo'nalishlari bo'yicha taqsimlangan kvotalar;

Nomzod pedagoglar – Ishchi guruhlar tomonidan taqsimlangan kvotalar sonidan kelib chiqib hududiy kengashlar tomonidan Ishchi guruhga taqdim etilgan pedagoglar.

3. Ishchi guruh tomonidan unga taqdim etilgan nomzodlar orasidan ustama to'lanadigan malakali pedagog kadrlarni tanlab olish quyidagi bosqichlarda amalga oshiriladi:

1-bosqichda — nomzodlarning dars beradigan umumta'lim fani bo'yicha bilim darajasini baholash uchun test sinovlari o'tkaziladi;

2-bosqichda — kasbiy mahoratini baholash uchun suhbat o'tkaziladi.

4. Maktabgacha va maktab ta'limi vazirligi va Oliy ta'lim, fan va innovatsiyalar vazirligi huzuridagi Bilim va malakalarni baholash agentligi o'rtasidagi shartnoma asosida 1-bosqich test sinovlari Agentlik tomonidan o'tkaziladi.

2-bob. Nomzod pedagoglarni ro'yxatini shakllantirish tartibi

5. Ishchi guruh hududlar va tuman (shahar)lar bo'yicha taqsimlagan kvotalarni hududiy kengashlarga taqdim etadi.

6. Hududiy kengashlar tuman (shahar) kvotasidan kelib chiqib har oylik ustama olish uchun nomzodlarni Ishchi guruhga taqdim etadi. Bunda:

har oylik ustama olishga nomzodlar vazirlar Mahkamasining 2022-yil 2-avgustdagi 425-son qarori bilan tasdiqlangan Xalq (*Maktabgacha va maktab*) ta'limi vazirining jamg'armasi to'g'risidagi nizomda belgilangan malakali pedagog kadrlar uchun qo'yilgan mezonlarga javob berishi lozim;

har bitta yo'nalish bo'yicha tegishli tuman (shahar) uchun belgilangan har bitta kvota o'rniga ko'pi bilan uchta nomzodni taqdim etish mumkin;

“Boshlang'ich ta'lim” yo'nalishi bo'yicha nomzod sifatida o'quvchilari Ixtisoslashtirilgan ta'lim muassasalari agentligi tizimidagi maktablarga kirish imtihonlarida eng yuqori natijalarni ko'rsatgan boshlang'ich sinf pedagog kadrlari taqdim etilishi mumkin.

7. Ishchi guruh hududiy kengashlar tomonidan taqdim etilgan nomzod pedagoglarni ro'yxatini umumlashtiradi.

3-bob. 1-bosqich test sinovlarini o'tkazish tartibi

8. Umumlashtirilgan ro'yxat Ishchi guruh tomonidan Bilim va malakalarni baholash agentligiga taqdim etiladi va Agentlik tomonidan nazorat materiallari tayyorlanadi.

9. Test sinovlari o'tkaziladigan joyi, kuni va vaqti haqida Nomzod pedagoglarga hududiy maktabgacha va maktab ta'limi boshqarmalari tomonidan xabar beriladi.

10. Test sinovida ishtirok etish uchun Nomzod pedagoglardan shaxsni tasdiqlovchi hujjatning (biometrik passport/ID-karta) asl nusxasini taqdim etish so'raladi. Asl nusxa taqdim etilmagan taqdirda Nomzod pedagog test sinovlariga qo'yilmaydi.

11. Nomzod pedagoglardan dars beradigan fanlari bo'yicha 40 ta savoldan iborat test sinovlari o'tkaziladi.

12. Test sinovlari uchun (javoblar varaqasini to'ldirish bilan birga) 100 daqiqa vaqt ajratiladi. Har bir to'g'ri javob uchun 2,5 ball beriladi.

13. 1-bosqich test sinovi natijasiga ko'ra maksimal ballning 80 foizidan past natija ko'rsatgan nomzodlar saralashning ikkinchi bosqichiga qo'yilmaydi, maksimal ballning 80 foizi yoki undan yuqori natija ko'rsatgan nomzodlar 2-bosqichga yo'l oladi.

14. 1-bosqich test sinovlari natijasiga ko'ra maksimal ballning 80 foizi yoki undan yuqori natija ko'rsatgan pedagoglarning natijasi 2-bosqichga chiqishiga asos sifatida foydalaniladi va ushbu natija 2-bosqich bo'yicha olgan natijasiga qo'shilmaydi.

15. 2-bosqichda — kasbiy mahoratini baholash uchun suhbat o'tkazish tartibi va mezonlari Maktabgacha va maktab ta'limi vazirining buyrug'i bilan tasdiqlanadi.

4-bob. Nomzod pedagog kadrlar shikoyatini ko'rib chiqish

16. 1-bosqich test natijalari e'lon qilingandan so'ng uch ish kunida Nomzod pedagog kadrlar test topshiriqlari bo'yicha Bilim va malakalarni baholash agentligiga shikoyat qilishi mumkin.

17. Test topshiriqlari bo'yicha Nomzod pedagog kadrlar shikoyati Bilim va malakalarni baholash agentligi tomonidan ko'rib chiqiladi va yozma shaklda javob beriladi.

5-bob. Yakunlovchi qoidalar

18. Ushbu Reglamentni qo'llashda yuzaga keladigan nizolar qonunchilikda belgilangan tartibda hal etiladi.